

HARMONIA

Nos patria stima
Nos Aruba bendiciona
Cu tur nos rikesanan.

E rikesa di mas grandi
Hopi ta esnan di origen di otro paisnan
Tambe yiu di universo, yiu di Dios
Ta confirma kiko e ta:
E trankilidad na Aruba.

Betico (d.f.m.) a expresa y accentua:
Si tin un luga
Unda hendenan
Ta biba den harmonia
Sin distincion di color, credo
O cualkier otro distincion
E luga ey ta Aruba.

Nos ta un pueblo
Cu ta biba den harmonia cu otro
Rico, pober, diferente religion
Blanco, bruin, color scur
Tur ta biba bon cu otro
E comprension cu ta existi na Aruba
Por ta un ehempel pa mundo.

Aruba ta na prome luga,
Realisa nos derecho di autodeterminacion,
Despues traha den cooperacion cu tur otro pueblonan.

Betico danki pa bo inspiracion.
Cu bo sabiduria y amor pa Aruba,
Semper lo ser manteni bibo.

Skirbi pa: Vilmio Wester
Oranjestad, 19 januari 2004

DIVERSIDAD

Transferencia
Transgeneracional
Comportacion siña

Comportacion socialmente no aceptabel
Comportacion irresponsabel
Complaciente, procedura oportunista, faboritismo
Recompensa comportacion socialmente no aceptabel
Reinfora comportacion socialmente no deseabel
Tranca desaroyo, modernisacion, bienestar y superacion personal.

Compasion y comprendemento
Curason y caridad
Cariño y entendimento.

Pensamento,
Emocion,
Escogencia,
Accion,
Consecuencia y responsabilidad.

Cultura ta expresion di bida
Bida ta un oportunidad
Prioridadnan den bida
Bida ta pa biba
Lesnan di bida, siña.

Ser humano ta individuo y unico
Fingerprint, DNA, emocion, aspiracion, anhelo, preocupacion, prioridad
Unico, individual
Potencial humano ta universal/ spiritual, sin distincion
Realisacion di potencial.
Cudishi y envidia.
Talento, habilidad, sacrificio, disciplina, sa realmente kiko bo kier
Combinacion di circunstancia, oportunidad y perseverancia.
Supervivencia: be a warrior not a worrier.
Trampolin pa otro realisa su potencial, potencial cu nos tur tin
Diversidad y solidaridad.

Diversidad humano: tolerancia, aprecio, merito, bondad, caridad, aceptacion;
Diversidad>potencial>realisacion>dinamismo>creatividad>innovacion
Motor di desaroyo, progreso y bienestar.

Vilmio Wester
Oranjestad, 14 mei 2012

PIEDRA

Tira piedra sconde man.
Manera un cangreu,
Core sconde bou di piedra.
Cubri bo mes di tur cos
Te ora di dia habri.

David den un confrontacion,
A wak Goliath su dilanti.
E la pensa awo si!
Goliath ta un gigante,
Kiko haci awo?

David a coy un piedra chikito,
Pone den su slinger,
Draai e duro rond.
E tabata zona duro
Den brisa di biento.

David y Goliath tabata
observa otro bon,
Nada di sconde.
David a basha Goliath abou,
Anto cu un piedra chikito!

Ofishinan di nos grandinan.
Traha cas y transhi di piedra.
Nos grandinan kibrando piedra.
Kibra piedra cu awa!
Piedra hopi duro mes.

Kime cu candela di pal'i mata,
Basha awa riba dje.
E piedra ta scheur,
Kibra piedra cu awa!
Artefactonan di piedra,

Herment di piedra.
Weganan cu piedra,
Stichi, keilo piedra y
tira piedra den hoki y bula.
Man'e un David y Goliath.

Pone piedra bou di lenga,
Pa ora bo gaña,
Mama no haya sa!
Cu miedo pa n' guli esaki
Y asina e ripara algo.

Keihi ta piedra pa traha transhi,
Manga pa mula maishi den piedra di mula.
Cudi tambe ta un piedra,
Cu awa aden.
Piedra seca pa traha muraya.

Baranca ta piedra.
Nos baranca adora.
Aruba, mi tera volcanico
E forsa di bo amor,
A kibra mi murayanan.

Vilmio Wester
Oranjestad, 20 september 2013

PLACA

Placa, unda bo ta?
Placa, mi no ta wak bo
Placa, mi no ta hole bo
Placa, mi no ta sinti bo

Placa, bo tin cu lora
Placa, mi no ta tende bo
Placa, bo no ta ningun caminda
Placa, lora bin cerca mi

Autor: Vilmio Wester
Oranjestad, 30 september 2013

MUCHA DI MACUARIMA

Por ta bo no ta corda,
Cuanto bo a dunami:
Respet, stimacion y cuido.
Mi barío tabata e paraíso.

Atardi ora mi sali for di school,
Nos tabata cana bay cas.
Yegando cas, di leu mi ta hole banana hasa
Y scucha musica ranchera, ora mexicana.

Ki sentimento dushi e recuerdonan aki ta dunami.
Loke mi ta wak, hole, tende y sinti:
Espacio, alegría, tranquilidad, unión, solidaridad y paz.
Mi Mama stima ta wardami na cas.

Den e caricianan profundo di mi sentidonan,
Mi ta corda tur mi famianan rond, asina cerca.
Nos mes tabata traha nos cos pa hunga y pa wega:
Flie, tromp, boto, avion, auto, step, stelten, stichi, slinger, guitarra y mas.

Nos mes tabata traha nos veld di bala.
Chapi bay y haci limpi, asina mes cu yen di veld den cercanía.
Nos tabata organisa nos mesun carnaval y wega di bingo.
Ki dushi den época di fin di año Gaita y Aguinaldo ta train pariba di cas.

E Dande tabata te'y, di cas pa cas.
Den veld: Dera Gai y Año di la Reina.
Nos tabata hunga hopi pafo y move hopi:
Tabatin espacio y tranquilidad.

Den e dushi solo tropical y e dushi brisa di passaat.
Nos tabata hunga, jaag y campa den mondi.
Na pia nos tabata cana bay y explora,
Te cu Sero Alejandro, Fontein, Sero Pita y Yamanota.

Nos tabata jaag riba Yuwana pa un persona special savoria.
Esta dushi, tur e caricianan pa mi sentidonan.
Macuarima ki suave y dushi tabata bo caricia.
Gratitud di profundo di mi alma pa e cuido, stimacion, respet,
Y tesoro manera espacio, paz y tranquilidad.

Autor: Vilmio Wester Oranjestad, 4 september 2014